

'S RAETS

MERKWAERDIGHE SLITINGHEN

1462—1466.

(Vervolg van bladz. 285).

1462. **W**ant Daem Ghysbertsz ende Laen, *syns soens wyf, over malcanders dorpel gheweest ende in een huys ghevonden syn, boven 'sraets slitinghe, daerom sellen si beide opter kaec staen ende drie jaer lanc naestcomende wt onser stat wesen ende een mile vander stat bliven op hoer liven (180).*

— **W**ant Borchon, Gheryts dochter *twoe stukken sulvers, die Tyman Ysbrantsz ghestolen waren, ontwe heeft helpen slaen ende ghesmouten heeft, daerom sel si opter kaec staen ende den steen draghen ende tien jaer wt onser stat wesen ende een mile vander stat bliven op hoer lyf (181).*

— **W**ant Hermanken, Willems dochter, *met maniere, dat niet secgelyc en is, vergheven heeft, enen, gheheten Jacob Elger, soe dat hi dull gheworden is, ende datselve oic meer personen inghegheven woude hebben, had si ghekont, soe si hoer selve dat al beliet heeft, soe sel men dat rechten metten brande aen hoeren live (182).*

1462. Want Jan Back, syn lyf teghen Jacob Gheritsz gheset heeft, *segghende, dat Jacob schuldich wesen soude des doets van Ja. Jansz van Sevenhusen, die omme onser stat opt Sant doetghesteken wert, heiwelc alsoe niet ervonden en is, mer Jan Back voersz. dese bi settinghe van hate ende nide ghedaen heeft, soe hi hem dat selve beliet heeft, daerom sel men dat rechten met den sweerde aen syn lyf (183).*

— Want Dirck Ghysbertsz van Lederdam, *mynhere, den Domproest t'Wtrecht onduechdeliken ende swaerliken beloghen ende hem oneerlick gherufte after syn rugghe ghespreyt heeft, soe hi hem dat selve beliet heeft, daermede mynhere voersz. swaerlike belast mochte hebben gheworden, hierom sel hi, opter kaec staen, ende men sel hem alomme voeren ende men sel hem gheselen ende in elke kinbacke teyckenen met enen slotel metten brande, ende die raet verbiet hem ewelic die stat ende een mile vander stat te bliven op syn lyf (184).*

1463. Want Korstgen Lambertsz vander Straten, die oude scoemaker, *ontamelike ende onreinlike dinghen binnen onser stat ghedaen heeft, daerom verbiet hem die raet onse stat twe jaer lanc naestcomende (185).*

— Die raet verbiet Jan Pietersz van Leyden, Jan Pietersz Dinslaken ende Alyt Rutgers dochter onse stat *van dieften c jaer lanc ende enen dach, ende si sellen een mile vander stat bliven op hoer lyf (186).*

— Want Bernt Pauwelsz tot Amersfoort, *in*

- onser Lieve Vrouwen kerke vele cleynoten ghestolen heeft, ende oec andere luden dat hoer ghestolen heeft, soe hi hem dat selve beliet heeft, daerom sel men dat *rechten metter line* aen syn lyf (187).
1463. Want Wouter Aernitz dat ryemken ghesteken heeft ende andere boefachtighe spuelen bedreven, ende ghehantiert heeft, daerom verbiet men hem tien jare onse stat (188).
1464. Want Prout Hubertz, een hws openghebroken heeft, ende darin Jan van Ghemen ondadeliken in syn bedde, daer hi sieck lach, ghesteken heeft, soe hi hem dat selve beliet heeft, daeraen Jan voersz. ghestorven is, daerom sel men dat *rechten metten sweerde* aen syn lyf (189).
- Want Lambert Jan Willemsz hem beholpen heeft mit *transinieringhe* ende den luden 't hore afgedreicht, soe hi hem dat selve beliet heeft, daerom sel men dat *rechten met den sweerde* an syn lyf (190).
- Want Jan Daemsz van Antwerpen, Jan Jacobsz vanden Bosch, ende Gheelken Henriksz van Antwerpen den goeden luden tot veele tiden ende steden budelen ofghesneden ende t hoer oec ghestolen hebben, soe si hem selver beliet hebben, daerom sel men dat *rechten met der linen* aen horen live (191).
- Want Dirc, Bontekan inde Wanderinghe gheheten, hem beholpen heeft mit *facilmenten* ende mit *onbehoirlike hantieringhe*, daerom heeft hi *opter kacc* ghestaen, ende die raet verbiet hem onse stat ende een mile vander stat te wesen ewelic op syn lyf (192).

1464. Want Matheus Petersz twe ghebeden heeft, die Peter den waker *boven enen vrede, den Matheus selver ghegheven hadde, ghewont hebben, daer Peter in die waec gaen soude, daerom sel men dat rechten aen Mathys (!) hant* (193).
- Want Jan Dryel, een wever een webbe gaerns *opten touwe onduechdeliken ontwe ghesneden heeft, daerom verbiet men hem onse stat twe jaer lanc ende een mile vander stat te bliven op syn lyf* (194).
- Want Willem Voghel *verwonnen is metter scoepen recht, met allen gheboden ende weten, ende inde Montade gherwmpst is, van weghe Arent Knoeps ende Ghysbert die grutters erfghenamen, soe verbiet men hem onse stat ende een mile vander stat te bliven op syn borgherscap ter tyt soe hi die voern. schuldenaers betaelt ende vernuecht sal hebben* (195).
- Die Raet verbiet Heyn Leyden, die men heet Heyn metten Hacken, ende Floer die ketelboeter *onse stat ende een mile vander stat te bliven ewelic op hore liven, om hoer onduechdeliker hantieringhe wille* (196).
1465. Want M^r. Claes, *dryakelmaker, onbehoerlike hantieringhe* bedreven heeft, daerom *verbiet men hem onse stat ewelic ende een mile vander stat te bliven ewelic op syn lyf* (197).
- Want Jan Hughensz *goeder lude kynderen tot vele tyden ghekoppelt heeft, ende andere onaerdicheyt bedreven heeft, daerom verbiet hem die raet onse stat ewelic ende een mile vander stat te wesen op syn lyf* (198).

1465. Want Andriesz Aerntsz, die mandemaker, dat ryempken ghesteken heeft, daerom verbiet hem die raet onse stat vyf jaer lanc naestcomende (199).

— Want Jan Willemsz, gheheten *Droghe Scootele*, woerde onduechdelik op Jan ende Arent van Rynes van Rynouwen ghevoert heeft, daerom verbiet men hem onse stat vyf jaer lanc naestcomende ende een mile vander stat te bliven op syn borgherscap (200).

— Want Gheryt Lubbertsz drie wiven ghetrouwt heeft, daerom verbiet hem onse raet ewelic onse stat ende een mile vander stat te bliven op syn lyf (201).

— Want Jan Hoicman, inder wandringhe gheheten *Onduechdelike*, binnen onser stat ghebenden heeft, daerom verbiet hem die raet vyf jaer lanc naestcomende onse stat ende een mile vander stat te blyven op syn lyf (202).

— Want Cornelis Petersz, gheheten *Scipper*, inde Wandringhe, Jan, ghenoept die *Gulden Kerel*, den God ghenedig sy, anderen daghes binnen onser stat ghesteken heeft, daervan die voersz. Jan ghestorven is, daerom sel men dat rechten metten sweerde aen syn lyf (203).

— Want Gheryt Venboet onduechdelik op onser stat rade ghesproken heeft, ende gheseyt, hi en vraechde noch nae raet, noch nae viven, noch nae sesse, ende hi woude, dat de stat van Utrecht in couden kolen laghe, indien hi selve daer wt ware, daerom verbiet hem die raet onse stat tien jaer lanc naestcomende ende een

- mile vander stat te bliven op syn lyf, ende daer en tenden nochtans niet weder in te comen dan biden rade (204).
1465. Want Dirc Herbern Florisz met *alle gheboden vervolcht ende verwonnen is metter clocken voer onsen rade ter antwoert te comen, om des wille, dat hi den abt van Sunte Pauwels inder kerke gheslaghen heeft, ende niet ghecomen is, daerom verbiet men hem onse stat ende een mile vander stat te bliven ewelic op syn lyf* (205).
1466. *Morghen sel men Jan Aerntsz, van Leyden gheselen op die plaets van dieften ende men sel hem scuppen ende die raet verbiet hem onse stat ewelic ende een mile vander stat te bliven op syn lyf* (206).
- Den rade van onser stat is bighecomen inder waerheit, *dat hier binnen is een, ghenoompt Peter van Stocroede, die bedraghen wort van Coenraet Tesch, den men over een jaer opten heiligen Palmavont van moertbrant, den hi hier binnen onser stat opten Camp ghedaen hadt, mitten brant inder Noide rechte, alsoe dat Peter voersz. die rechte oersake wesen soude vanden selven moertbrande, daerop Conraet, dien God ghenedich sy, ghestorven is; want dan den rade bighecomen is, dat Peter voersz. hier binnen wesen soude, daerom laet die raet weten ende ghebiet een yegheliken, dat een yeghelic in synre buerten terstont narstighen ondersoec doe mit sinen bueren, om Peter voersz. te vynden ende onsen rade te leveren; ende yemant, die hem venghe ofte vonde,*

bi alsoe dat hi ghevanghen ende ghelevert worde, den soude die stat terstont doen gheven aen reyden ghelde hondert pont onser stat payments. Ende waer yemant, die den selven Peter huesde of hoofde ende niet voert en brochte noch en openbaerde, ende die raet dat ter waerheit bevonde, dat woude die raet aen hem dan rechten, ghelyck men anden moertbrander doen soude. Ende op dat een yeghelic den selven Peter te beth kennen mach, soe waerschuwet die raet enen yegheliken, dattet een middelbre man is, breet van schouderen, bruyen ende ront van aensichte, wail ghemaect van live ende bruyen van haer. Voert laet die raet weten enen yegheliken, waert sake, dat Peter voerseide nu ontghinghe ende yemant, die hem hier namaels venghe ende onser stat leverde, dat denselven, die hem leverde, die stat sel terstont doen gheven hondert pont onser stat payments aen reyden ghelde (207).

(Het vervolg hierna).

J. J. DODT v. FL.

STATISTIEK DER KERNISSEN VAN 1840—1843.

	1840.	1841.	1842.	1843.
Kramen.....	100	91	88	85
Wafelkramen.....	17	14	14	15
Poffertjeskramen.....	24	26	26	26
Koekkramen.....	26	26	26	24
Plaatkoekkramen.....	3	3	3	4
Spekkramen.....	2	2	1	2
Zuurkramen.....	2	2	1	1
Pottekramen.....	7	4	4	5
Spellen.....	19	19	22	20
Malmolens en Schopstoelen.	3	5	3	4